

中國方志叢書·華中地方·第三七九號

據

清·張琴修，
同治五年刊本
范泰衡纂

影印

四川省

萬縣志

(三)

成文出版社有限公司印行

中華民國六十五年

月臺一版

萬縣志

全三冊

發行人：**黃**

成

助

出版者：**成文出版社有限公司**

台北市郵政信箱二二六〇五號

台北市羅斯福路三段二四〇巷五號

印刷者：**成文出版社有限公司**

內政部登記證內版台業字第一一四七號

增修萬縣志卷三十二

士女志

義行

郡志急公尚義紳民志藁易名曰任卹而附於食貨
蠲政後纂錄不均存沒爲一節之善實事可徵也今
仍從郡志例目曰義行附士女志中以旌善人

國朝

杜之耦 郡志之耦邑附貢生字維師性敦慤好施
與乾隆戊戌己亥歲不登斗米錢二千之耦於德堡

火神廟施粥數月存活頗多
杜樸郡志樸萬邑處士字天民性公直好施與歲
荒施粥道路掩骼埋胔不計其數邑人咸稱好義厥
後子孫以詩禮發家人以爲好義之報

劉萬良劉萬福郡志萬良萬福胞兄弟也任奉節

劉家山萬邑清水塘乾隆三十六年修石大路自雲
陽岐陽關中過萬邑清水塘至奉節大埡口共六十
餘里捐銀一千四百兩萬良萬福物故良妻莫氏福
妻黃氏命子富文富陞富貴生員廷貞於嘉慶二

四年二月修石大路自雲陽瀘沙坡經萬邑天池坡至奉節漆水槽計八十餘里共用銀二千餘兩萬縣知縣仇如玉給額樂善不倦又捐設豫興義學知府恩成給額教先鄉塾

向天序 郡志天序萬縣人爲人慷慨端方嘉慶九年見江水泛漲浮屍漂流爰捐資買燕子窩山地二畝埋瘞每雇人撈浮屍約計每歲撈獲八九十人不等力行不懈

王德慧 郡志德慧萬縣人廩生王子珍祖父住邑

西指橫溪右達開縣左達梁山雨後溪水暴漲急流
難涉行人苦之德慧於嘉慶十九年捐修石橋費千
金橋成亦不鐫石表各人以爲隱德云

嚴聖賢 郡志聖曾萬縣監生素性孝友好善樂施
兼明大義乾隆戊戌己亥連年饑饉買米四百餘石
賑濟饑民後每遇饑荒施濟嘉慶二三年教匪猖獗
募集義勇二百餘名於黃柏溪設卡堵禦三百餘名
於分水嶺碑牌黃杆石設卡以防賊首林之華南竄
匪不敢入計二載共用數千金邑令王世燾贈以辟

雍譽髦匾額至其排難解紛施醫藥設義館教族子弟買義田贍族造渡船橋梁善事未可枚舉子性懷性悌俱廩生性愼監生克守父訓

邱宗昌 郡志萬邑人年八十三歲秉性正直素行仁厚居苾溪土橋乾隆戊戌年遭回祿周圍盡焚獨宗昌茅屋數間獲免邑令往勘異之間其素行對云平生無好處惟鄭重五穀耳嘉慶己未庚申間教匪擾縣焚掠四起宗昌居屋仍無恙其人殆有陰德不自表暴鄭重五穀特一端耳

藍琤 郡志琤萬縣監生爲人公正取與不苟尤慷
慨有志畧嘉慶二三年間賊匪猖獗城外民居燒燬
殆盡邑令陳文鴻王世燾先後延琤監築礮臺賊至
晝夜巡城不懈其他賑窮恤貧解紛息爭及監修

文廟養濟院諸工程尤盡心力樂善不倦人咸重之
易成富 郡志成富萬縣監生明理端品誠篤不欺

嘉慶二三年間賊匪竄擾成富偕紳耆於苾溪岸修
土城六百八十餘丈捐銀一千八百餘兩功始告竣
卽率領鄉勇堵禦邑人德之 今土城圯

郝二相 郡志二相三世節孝壽八十餘城樂善好
施念長江溺死多作餓鬼山間荒塚不乏孤魂命子
捐銀三百餘兩存城隍廟買田收租每年中元賑濟
賀盛文 邑監生夔郡舊無耆耋官紳屢議合六屬
力共建而不行盛文慨然獨任命子代元畱夔城監
修經始道光二十七年迨二十九年將落成而盛文
物故至三十年春告竣計號舍二十九間坐號千七
百有奇自轅門甬壁旗杆樂樓頭儀門抱廳大堂二
堂衡文堂計九層及左右供役房共百有五間圍墻

百餘丈院右建提調公館內堂大堂頭門計三層上有五間統計捐錢二萬一千八百餘緡咸豐三年議敘賀代元鹽運使司運同銜盛文於道光二十六年城外火災周卹貧戶錢數百千咸豐二年邑設賓興會代元弟兄捐銀一千二百兩粵匪之役捐輸軍餉銀一千二百兩萬縣籌防捐錢五百千倡爲全貞會捐錢千緡均爲人所難云

劉光廷 字丹山邑貢生輕財好義市郭里二道河至馬壩塘乃利萬往來道爲險所阻光廷於道光庚

寅年捐銀千二百餘兩鑿穿高穴子石岩長百六十餘丈砌成大路修平湮竈子岩黃杆石岩共四十餘里連建平橋三座越三年工竣行旅歌誦弗輟邑衿耆爲請獎敘不受乃刊萬功岩三字於石壁以誌不忘光廷歿其妻嚴氏亦好善凡橋路壞卽命子增生德元等補修

魏元彬 字君儒性醇謹勤儉捐田數十畝爲祠田以敬宗睦族嘉慶二年教匪竄小江元彬捐米三十石集團勇於九堆飛攬堵禦南岸獲安子士良舉孝

義執中 恩貢生

易光晨 字曉亭邑廩貢歷署金堂廣元西陽訓導
性質樸端方尤多義舉邑虬溪講易臺年久荒蕪光
晨慨然倡建來公祠兼作義館刊來氏大學古本時
集少長講明六行子瀚孝廉灌縣教諭濂湖北候補
從九孫棫庠生

牟登順 幼失怙恃爲人牧牛忠而勤及壯傭工銖
積百餘金罄貲以建宗祠孝義魏士良爲修譜焉順
佃耕作至六旬後積貲四百餘金卽以三百五十

金買田交樂善堂備凶年平糶富人愧之

杜祥 邑監生字吉人性端方戇直少孤事母謹篤

友愛撫姪猶子重然諾視公事如家事邑 文昌廟

頽敗捐募重修並及東關外道邑人以祥公正詣練

任勞怨凡大興作必請督工 火神廟北山觀皆年

餘始成族姪鍾嶠捐建考棚尤鉅祥慨然獨任朝出

暮歸者凡三年而不倦邑宰仇如玉建書院養濟院

公樂堂祥偕紳耆四鄉募捐始克歲事邑言急公竭

力必首推焉嘗以柏林壩田租二十石施入安懷所

子協增生惠霖庠生姪恂愉擇俱廩生析庠生

陳維祺 邑貢生異母弟負貲千金祺代償之析產

復合聞者感愧倡捐重貲修譜建宗祠餘金數百歲
取以贍族人性憐貧每歲杪施米前邑宰興善獎以
好善樂施匾額予新輝庠生

程善寶 性忠厚勇於爲善建宗祠設義渡施義塚
捐修太平橋創修開邑大埡口石路逾年始成修王
家橋至沱口石路二十餘里改修四層岩石路縣馬
頭石梯數百丈助修漢渡張家萬平三橋補修司馬

橋監修城垣廟祠素有足疾凡橋路大工恆奔走不
倦人以爲難由縣申詳給八品頂戴

曹芳蘭 道光六七年捐修新萬交界葛麻梁黑溝

槽陡梯子石路五十里蝦蟆石余家坡石路四十里

計錢三千六百餘串由縣申詳給九品頂戴子職員

元登捐修斷石橋寨梁石路後復捐重貲倡募改修

分水黑洞溝路募錢萬有六千緡危崖峭壁竟成坦

道修路近五十年身親險阻無冬無夏行人咸利賴

焉登子宏田常製藥救人爲大周里團總認真辦三

成丁穀釐親歷百有餘寨積勞感寒以卒官紳莫不
惜之

李習易 萬開之交有溪河數十里無舟楫易首捐
重貲倡設義渡三津往來稱便喜修路善相地勢開
闢險阻其修麻梯及新甯大蛭口尤利行人家數千
金平生施濟幾耗其半

王天星 幼孤與母相失及長以醫術遊四方尋母
得於湖北巴東縣已適李天相家六年之中不遠千
里連往省母十次天相亡乃迎母歸養業師貧無子

生養而死殯之

譚爲榮 少貧苦及長經營成家輕財重義周急濟困老而不倦捐募修建街樓官路及司馬橋行者便之前郡守瑪給予爲善最樂匾額以示優獎子長志監生

劉振仁 素好義其堂姪早失怙恃撫之成立無異親生恆解紛排難矜恤孤貧修補橋路施藥餌棺木十數年不倦子家謨廩生工詩文書法同治元年兩藍逆先後犯境萬縣戒嚴家謨總司城防局勤勞特